

# Phaedra

Lucius Annaeus Seneca minor

Hippolytus Ite, umbrosas cingite siluas  
 summaque montis iuga Cecropii!  
 celeri planta lustrate uagi  
 quae saxoso loca Parnetho  
     subiecta iacent,  
 quae Thriasiis uallibus amnis           5  
 rapida currens uerberat unda;  
 scandite colles semper canos  
     niue Rhiphaea.  
 Hac, hac alii qua nemus alta  
 textitur alno, qua prata patent           10  
 quae rorifera mulcens aura  
 Zephyrus uernas euocat herbas,  
 ubi per graciles breuis Ilisos  
 labitur agros piger et steriles  
 amne maligno radit harenas.           15  
 Vos qua Marathon tramite laeuo  
     saltus aperit,  
 qua comitatae gregibus paruis  
 nocturna petunt pabula fetae;  
 uos qua tepidis subditus austris           20  
 frigora mollit durus Acharneus.  
 Alius rupem dulcis Hymetti,  
 ~paruas alius calcet Aphidnas;  
 pars illa diu uacat immunis,  
 qua curuati litora ponti           25  
     Sunion urget.  
 si quem tangit gloria siluae,  
     uocat hunc ~flius:  
 hic uersatur, metus agricolis,  
 uulnere multo iam notus aper.           30  
     At uos laxas canibus tacitis  
     mittite habenas;  
 teneant acres lora Molossos  
 et pugnaces tendant Cretes  
 fortia trito uincula collo.  
 at Spartanos (genus est audax           35  
 audumque ferae) nodo cautus  
     propiore liga:  
 ueniet tempus, cum latratu  
     caua saxa sonent.  
 nunc demissi nare sagaci  
 captent auras lustraue presso           40  
 quaerant rostro, dum lux dubia est,  
 dum signa pedum roscida tellus  
     impressa tenet.

Alius raras ceruice graui  
 portare plagas,  
 alius teretes properet laqueos. 45  
 picta rubenti linea pinna  
 uano cludat terrore feras.  
 Tibi libretur missile telum,  
 tu graue dextra laeuaque simul  
 robur lato derige ferro; 50  
 tu praecipites clamore feras  
 subsessor ages;  
 tu iam uictor curuo solues  
 uiscera cultro.  
 Ades en comiti, diua uirago,  
 cuius regno pars terrarum 55  
 secreta uacat,  
 cuius certis petitur telis  
 fera quae gelidum potat Araxen  
 et quae stanti ludit in Histro.  
 tua Gaetulos dextra leones, 60  
 tua Cretaeas sequitur ceruas;  
 nunc ueloces figis dammas  
 leuiore manu.  
 tibi dant uariae pectora tigres,  
 tibi uillosi terga bisontes  
 latisque feri cornibus uri. 65  
 quidquid solis pascitur aruis,  
 siue illud Arabs diuite silua,  
 siue illud inops nouit Garamans  
 uacuisue uagus Sarmata campis, 71  
 siue ferocis iuga Pyrenes 69  
 siue Hyrcani celant saltus,  
 arcus metuit, Diana, tuos. 72  
 Tua si gratus numina cultor  
 tulit in saltus,  
 retia uinctas tenuere feras, 75  
 nulli laqueum rupere pedes:  
 fertur plaustro praeda gementi.  
 tum rostra canes sanguine multo  
 rubicunda gerunt,  
 repetitque casas rustica longo  
 turba triumpho. 80  
 En, diua, faue! signum arguti  
 misere canes: uocor in siluas.  
 hac, hac pergam qua uia longum  
 compensat iter.  
 Phaedra O magna uasti Creta dominatrix freti, 85  
 cuius per omne litus innumerae rates  
 tenuere pontum, quidquid Assyria tenus  
 tellure Nereus peruium rostris secat,

cur me in penates obsidem inuisos datam  
hostique nuptam degere aetatem in malis 90  
lacrimisque cogis? profugus en coniunx abest  
praestatque nuptae quam solet Theseus fidem.

fortis per altas inuii retro lacus  
uadit tenebras miles audacis proci,  
solio ut reuulsam regis inferni abstrahat; 95  
pergit furoris socius, haud illum timor  
pudorue tenuit: stupra et illicitos toros  
Acheronte in imo quaerit Hippolyti pater.

Sed maior alius incubat maestae dolor.  
non me quies nocturna, non altus sopor 100  
soluere curis: alitur et crescit malum  
et ardet intus qualis Aetnaeo uapor  
exundat antro. Palladis telae uacant  
et inter ipsas pensa labuntur manus;

non colere donis templa uotiuus libet, 105  
non inter aras, Atthidum mixtam choris,  
iactare tacitis conscias sacris faces,  
nec adire castis precibus aut ritu pio  
adiudicatae praesidem terrae deam:  
iuuat excitatas consequi cursu feras 110  
et rigida molli gaesa iaculari manu.

Quo tendis, anime? quid furens saltus amas?  
fatale miserae matris agnosco malum:  
peccare noster nouit in siluis amor.  
genetrix, tui me miseret? infando malo 115  
correpta pecoris efferum saeui ducem  
audax amasti; toruus, impatiens iugi  
adulter ille, ductor indomiti gregis--

sed amabat aliquid. quis meas miserae deus  
aut quis iuuare Daedalus flammas queat? 120  
non si ille remeet, arte Mopsopia potens,  
qui nostra caeca monstra conclusit domo,  
promittat ullam casibus nostris opem.

stirpem perosa Solis inuisi Venus  
per nos catenas uindicat Martis sui 125  
suasque, probris omne Phoebeum genus  
onerat nefandis: nulla Minois leui  
defuncta amore est, iungitur semper nefas.

Nvtrix Thesea coniunx, clara progenies Iouis,  
nefanda casto pectore exturba ocus, 130  
extingue flammas neue te dirae spei  
praebe obsequentem: quisquis in primo obstitit  
pepulitque amorem, tutus ac uictor fuit;  
qui blandiando dulce nutriuit malum,  
sero recusat ferre quod subiit iugum. 135

nec me fugit, quam durus et ueri insolens  
ad recta flecti regius nolit tumor.

quemcumque dederit exitum casus feram:  
fortem facit uicina libertas senem.

Honesta primum est uelle nec labi uia, 140  
pudor est secundus nosse peccandi modum.

quo, misera, pergis? quid domum infamem aggrauas  
superasque matrem? maius est monstro nefas:  
nam monstra fato, moribus scelera imputes.

Si, quod maritus supera non cernit loca, 145  
tutum esse facinus credis et uacuum metu,

erras; teneri crede Lethaeo abditum  
Thesea profundo et ferre perpetuam Styga:

quid ille, lato maria qui regno premit  
populisque reddit iura centenis, pater? 150

latere tantum facinus occultum sinet?  
sagax parentum est cura. Credamus tamen

astu doloque tegere nos tantum nefas:  
quid ille rebus lumen infundens suum, 155

matris parens? quid ille, qui mundum quatit  
uibrans corusca fulmen Aetnaeum manu,

sator deorum? credis hoc posse effici,  
inter uidentes omnia ut lateas auos?

Sed ut secundus numinum abscondat fauor  
coitus nefandos utque contingat stupro 160

negata magnis sceleribus semper fides:  
quid poena praesens, conscius mentis pauor

animusque culpa plenus et semet timens?  
scelus aliqua tutum, nulla securum tulit.

Compesce amoris impii flammam, precor, 165  
nefasque quod non ulla tellus barbara

commisit umquam, non uagi campis Getae  
nec inhospitalis Taurus aut sparsus Scythes;

expelle facinus mente castifica horridum  
memorque matris metue concubitus nouos. 170

miscere thalamos patris et gnati apparatus  
uteroque prolem capere confusam impio?

perge et nefandis uerte naturam ignibus.  
cur monstra cessant? aula cur fratris uacat?

prodigia totiens orbis insueta audiet, 175  
natura totiens legibus cedit suis,

quotiens amabit Cressa? Ph. Quae memoras scio  
uera esse, nutrix; sed furor cogit sequi

peiora. uadit animus in praeceps sciens  
remeatque frustra sana consilia appetens. 180

sic, cum grauata nauita aduersa ratem  
propellit unda, cedit in uanum labor

et uicta prono puppis aufertur uado.  
quid ratio possit? uicit ac regnat furor,

potensque tota mente dominatur deus. 185  
hic uoluer omni pollet in terra impotens

ipsumque flammis torret indomitis Iouem;  
 Gradius istas belliger sensit faces,  
 opifex trisulci fulminis sensit deus,  
 et qui furentis semper Aetnaeis iugis 190  
 uersat caminos igne tam paruo calet;  
 ipsumque Phoebum, tela qui neruo regit,  
 figit sagitta certior missa puer  
 uolitatque caelo pariter et terris grauis.  
 Nvt. Deum esse amorem turpis et uitio fauens 195  
 finxit libido, quoque liberior foret  
 titulum furori numinis falsi addidit.  
 natum per omnis scilicet terras uagum  
 Erycina mittit, ille per caelum uolans  
 proterua tenera tela molitur manu 200  
 regnumque tantum minimus e superis habet:  
 uana ista demens animus asciuit sibi  
 Venerisque numen finxit atque arcus dei.  
 Quisquis secundis rebus exultat nimis  
 fluitque luxu, semper insolita appetit. 205  
 tunc illa magnae dira fortunae comes  
 subit libido: non placent suetae dapes,  
 non texta sani moris aut uilis scyphus.  
 cur in penates rarius tenues subit  
 haec delicatas eligens pestis domos? 210  
 cur sancta paruis habitat in tectis Venus  
 mediumque sanos uulgus affectus tenet  
 et se coercent modica, contra diuites  
 regnoque fulti plura quam fas est petunt?  
 quod non potest uult posse qui nimium potest. 215  
 quid deceat alto praeditam solio uide:  
 metue ac uerere sceptras remeantis uiri.  
 Ph. Amoris in me maximum regnum reor  
 reditusque nullos metuo: non umquam amplius  
 conuexa tetigit supera qui mersus semel 220  
 adiit silentem nocte perpetua domum.  
 Nvt. Ne crede Diti. clausuram regnum licet,  
 canisque diras Stygius obseruet fores:  
 solus negatas inuenit Theseus uias.  
 Ph. Veniam ille amori forsitan nostro dabit. 225  
 Nvt. Immitis etiam coniugi castae fuit:  
 experta saeuam est barbara Antiope manum.  
 sed posse flecti coniugem iratum puta:  
 quis huius animum flectet intractabilem?  
 exosus omne feminae nomen fugit, 230  
 immitis annos caelibis uitae dicat,  
 conubia uitat: genus Amazonium scias.  
 Ph. Hunc in niuosi collis haerentem iugis,  
 et aspera agili saxa calcantem pede  
 sequi per alta nemora, per montes placet. 235

Nvt. Resistet ille seque mulcendum dabit  
 castosque ritus Venere non casta exuet?  
 tibi ponet odium, cuius odio forsitan  
 persequitur omnes? Ph. Precibus haud uinci potest?  
 Nvt. Ferus est. Ph. Amore didicimus uinci feros. 240  
 Nvt. Fugiet. Ph. Per ipsa maria si fugiat, sequar.  
 Nvt. Patris memento. Ph. Meminimus matris simul.  
 Nvt. Genus omne profugit. Ph. Paelicis careo metu.  
 Nvt. Aderit maritus. Ph. Nempe Pirithoi comes?  
 Nvt. Aderitque genitor. Ph. Mitis Ariadnae pater. 245  
 Nvt. Per has senectae splendidae supplex comas  
 fessumque curis pectus et cara ubera  
 precor, furorem siste teque ipsa adiua:  
 pars sanitatis uelle sanari fuit.  
 Ph. Non omnis animo cessit ingenuo pudor. 250  
 paremus, altrix. qui regi non uult amor,  
 uincatur. haud te, fama, maculari sinam.  
 haec sola ratio est, unicum effugium mali:  
 uirum sequamur, morte praeuertam nefas.  
 Nvt. Moderare, alumna, mentis effrenae impetus, 255  
 animos coerce. dignam ob hoc uita reor  
 quod esse temet autumas dignam nece.  
 Ph. Decreta mors est: quaeritur fati genus.  
 laqueone uitam finiam an ferro incubem?  
 an missa praeceps arce Palladia cadam? 260  
 Nvt. Sic te senectus nostra praecipiti sinat 262  
 perire leto? siste furibundum impetum.  
 [haud quisquam ad uitam facile reuocari potest]  
 Ph. Prohibere nulla ratio periturum potest, 265  
 ubi qui mori constituit et debet mori.  
 proin castitatis uindicem armemus manum. 261  
 Nvt. Solamen annis unicum fessis, era, 267  
 si tam proteruus incubat menti furor,  
 contemne famam: fama uix uero fauet,  
 peius merenti melior et peior bono. 270  
 temptemus animum tristem et intractabilem.  
 meus iste labor est aggredi iuuenem ferum  
 mentemque saeuam flectere immitis uiri.  
 Chorvs Diua non miti generata ponto,  
 quam uocat matrem geminus Cupido: 275  
 impotens flammis simul et sagittis  
 iste lasciuus puer et renidens  
 tela quam certo moderatur arcu!  
 [labitur totas furor in medullas  
 igne furtiuo populante uenas.] 280  
 non habet latam data plaga frontem,  
 sed uorat tectas penitus medullas.  
 nulla pax isti puero: per orbem  
 spargit effusas agilis sagittas;

quaeque nascentem uidet ora solem, 285  
 quaeque ad Hesperias iacet ora metas,  
 si qua feruenti subiecta cancro est,  
 si qua Parrhasiae glacialis ursae  
 semper errantes patitur colonos,  
 nouit hos aestus: iuuenum feroces 290  
 concitat flammis senibusque fessis  
 rursus extinctos reuocat calores,  
 uirginum ignoto ferit igne pectus--  
 et iubet caelo superos relicto  
 uultibus falsis habitare terras. 295  
     Thessali Phoebus pecoris magister  
 egit armentum positoque plectro  
 impari tauros calamo uocauit.  
 Induit formas quotiens minores  
 ipse qui caelum nebulasque ducit! 300  
 candidas ales modo mouit alas,  
 dulcior uocem moriente cygno;  
 fronte nunc torua petulans iuuenus  
 uirginum strauit sua terga ludo,  
 perque fraternos, noua regna, fluctus 305  
 ungula lentos imitante remos  
 pectore aduerso domuit profundum,  
 pro sua uector timidus rapina.  
 Arsit obscuri dea clara mundi  
 nocte deserta nitidosque fratri 310  
 tradidit currus aliter regendos:  
 ille nocturnas agitare bigas  
 discit et gyro breuiore flecti,  
 nec suum tempus tenere noctes  
 et dies tardo remeauit ortu, 315  
 dum tremunt axes grauiore curru.  
     Natus Alcmena posuit pharetras  
 et minax uasti spoliū leonis,  
 passus aptari digitis smaragdos 320  
 et dari legem rudibus capillis;  
 crura distincto religauit auro,  
 luteo plantas cohibente socco;  
 et manu, clauam modo qua gerebat,  
 fila deduxit properante fuso.  
     Vidit Persis ditique ferax 325  
     Lydia harena  
 deiecta feri terga leonis  
 umerisque, quibus sederat alti  
     regia caeli,  
 tenuem Tyrio stamine pallam.  
     Sacer est ignis (credite laesis) 330  
     nimiumque potens:  
 qua terra salo cingitur alto

quaque per ipsum candida mundum  
     sidera currunt,  
 hac regna tenet puer immitis,  
 spicula cuius sentit in imis                   335  
 caerulus undis grex Nereidum  
 flammamque nequit releuare mari.  
 Ignes sentit genus aligerum;  
 Venere instinctus suscipit audax  
 grege pro toto bella iuuenus;                   340  
 si coniugio timuere suo,  
 poscunt timidi proelia cerui  
 et mugitu dant concepti  
     signa furoris;  
 tunc uulnificos acuit dentes                   346  
 aper et toto est spumeus ore:  
 tunc silua gemit murmure saeuo.                   350  
 Poeni quatiunt colla leones,                   348  
     cum mouit amor;  
 tunc uirgatas India tigres                   345  
     decolor horret.  
 amat insani belua ponti                   351  
 Lucaeque boues: uindicat omnes  
 natura sibi, nihil immune est,  
 odiumque perit, cum iussit amor;  
 ueteres cedunt ignibus irae.                   355  
 quid plura canam? uincit saeuas  
     cura nouercas.  
     Altrix, profare quid feras; quonam in loco est  
 regina? saeuus ecquis est flammis modus?  
     Nvtrix Spes nulla tantum posse leniri malum,                   360  
 finisque flammis nullus insanis erit.  
 torretur aestu tacito et inclusus quoque,  
 quamuis tegatur, proditur uultu furor;  
 erumpit oculis ignis et lassae genae  
 lucem recusant; nil idem dubiae placet,                   365  
 artusque uarie iactat incertus dolor:  
 nunc ut soluto labitur marcens gradu  
 et uix labante sustinet collo caput,  
 nunc se quieti reddit et, somni immemor,  
 noctem querelis ducit; attolli iubet                   370  
 iterumque poni corpus et solui comas  
 rursusque fingi: semper impatiens sui  
 mutatur habitus. nulla iam Cereris subit  
 cura aut salutis; uadit incerto pede,  
 iam uiribus defecta: non idem uigor,                   375  
 non ora tinguens nitida purpureus rubor;  
 [populatur artus cura, iam gressus tremunt,  
 tenerque nitidi corporis cecidit decor.]  
 et qui ferebant signa Phoebeae facis

oculi nihil gentile nec patrium micant. 380  
 lacrimae cadunt per ora et assiduo genae  
 rore irrigantur, qualiter Tauri iugis  
 tepido madescunt imbre percussae niues.  
 Sed en, patescunt regiae fastigia:  
 reclinis ipsa sedis auratae toro 385  
 solitos amictus mente non sana abnuit.  
 Phaedra Remouete, famulae, purpura atque auro inlitas  
 uestes, procul sit muricis Tyrii rubor,  
 quae fila ramis ultimi Seres legunt:  
 breuis expeditos zona constringat sinus, 390  
 ceruix monili uacua, nec niueus lapis  
 deducat auris, Indici donum maris;  
 odore crinis sparsus Assyrio uacet.  
 sic temere iactae colla perfundant comae  
 umerosque summos, cursibus motae citis 395  
 uentos sequantur. laeua se pharetrae dabit,  
 hastile uibret dextra Thessalicum manus:  
 [talis seueri mater Hippolyti fuit.]  
 qualis relictis frigidi Ponti plagis  
 egit cateruas Atticum pulsans solum 400  
 Tanaitis aut Maeotis et nodo comas  
 coegit emisitque, lunata latus  
 protecta pelta, talis in siluas ferar.  
 Cho. Sepone questus: non leuat miseros dolor;  
 agreste placa uirginis numen deae. 405  
 Nvt. Regina nemorum, sola quae montes colis  
 et una solis montibus coleris dea,  
 conuerte tristes ominum in melius minas.  
 o magna siluas inter et lucos dea,  
 clarumque caeli sidus et noctis decus, 410  
 cuius relucet mundus alterna uice,  
 Hecate triformis, en ades coeptis fauens.  
 animum rigentem tristis Hippolyti doma:  
 det facilis aures; mitiga pectus ferum:  
 amare discat, mutuos ignes ferat. 415  
 innecte mentem: toruus auersus ferox  
 in iura Veneris redeat. huc uires tuas  
 intende: sic te lucidi uultus ferant  
 et nube rupta cornibus puris eas,  
 sic te regentem frena nocturni aetheris 420  
 detrahare numquam Thessali cantus queant  
 nullusque de te gloriam pastor ferat.  
 Ades inuocata, iam faue uotis, dea:  
 ipsum intuor sollemne uenerantem sacrum  
 nullo latus comitante--quid dubitas? dedit 425  
 tempus locumque casus: utendum artibus.  
 trepidamus? haud est facile mandatum scelus  
 audere, uerum iusta qui reges timet

deponat, omne pellat ex animo decus:  
malus est minister regii imperii pudor. 430

Hippolytvs Quid huc seniles fessa moliris gradus,  
o fida nutrix, turbidam frontem gerens  
et maesta uultu? sospes est certe parens  
sospesque Phaedra stirpis et geminae iugum?  
Nvt. Metus remitte, prospero regnum in statu est 435  
domusque florens sorte felici uiget.  
sed tu beatiss mitior rebus ueni:  
namque anxiam me cura sollicitat tui,  
quod te ipse poenis grauibus infestus domas.  
quem fata cogunt, ille cum uenia est miser; 440  
at si quis ultro se malis offert uolens  
seque ipse torquet, perdere est dignus bona  
quis nescit uti. potius annorum memor  
mentem relaxa: noctibus festis facem  
attolle, curas Bacchus exoneret graues; 445  
aetate frui: mobili cursu fugit.  
nunc facile pectus, grata nunc iuueni Venus:  
exultet animus. cur toro uiduo iaces?  
tristem iuuentam solue; nunc cursus rape,  
effunde habenas, optimos uitae dies 450  
effluere prohibe. propria descripsit deus  
officia et aeuum per suos ducit gradus:  
laetitia iuuenem, frons decet tristis senem.  
Quid te coerces et necas rectam indolem?  
seges illa magnum fenus agricolae dabit 455  
quaecumque laetis tenera luxuriat satis,  
arborque celso uertice euincet nemus  
quam non maligna caedit aut resecat manus:  
ingenia melius recta se in laudes ferunt,  
si nobilem animum uegeta libertas alit. 460  
truculentus et siluester ac uitae inscius  
tristem iuuentam Venere deserta coles?  
hoc esse munus credis indictum uiris,  
ut dura tolerant, cursibus domitent equos  
et saeua bella Marte sanguineo gerant? 465

Prouidit ille maximus mundi parens,  
cum tam rapaces cerneret Fati manus,  
ut damna semper subole repararet noua.  
excedat aedum rebus humanis Venus,  
quae supplet ac restituit exhaustum genus: 470  
orbis iacebit squalido turpis situ,  
uacuum sine ullis piscibus stabit mare,  
alesque caelo derit et siluis fera,  
solis et aer peruius uentis erit.  
quam uaria leti genera mortalem trahunt 475  
carpuntque turbam, pontus et ferrum et doli!  
sed fata credas desse: sic atram Styga

iam petimus ultro. caelibem uitam probet  
 sterilis iuuentus: hoc erit, quidquid uides,  
 unius aeui turba et in semet ruet. 480  
 proinde uitae sequere naturam ducem:  
 urbem frequenta, ciuium coetus cole.  
 Hi. Non alia magis est libera et uitio carens  
 ritusque melius uita quae priscos colat,  
 quam quae relictis moenibus siluas amat. 485  
 non illum auarae mentis inflammat furor  
 qui se dicauit montium insontem iugis,  
 non aura populi et uulgus infidum bonis,  
 non pestilens inuidia, non fragilis fauor;  
 non ille regno seruit aut regno imminens 490  
 uanos honores sequitur aut fluxas opes,  
 spei metusque liber, haud illum niger  
 edaxque liuor dente degeneri petit;  
 nec scelera populos inter atque urbes sata  
 nouit nec omnes conscius strepitus pauet 495  
 aut uerba fingit; mille non quaerit tegi  
 diues columnis nec trabes multo insolens  
 suffigit auro; non cruor largus pias  
 inundat aras, fruge nec sparsi sacra  
 centena niuei colla summittunt boues: 500  
 sed rure uacuo potitur et aperto aethere  
 innocuus errat. callidas tantum feris  
 struxisse fraudes nouit et fessus graui  
 labore niueo corpus Iliso fouet;  
 nunc ille ripam celeris Alphei legit, 505  
 nunc nemoris alti densa metatur loca,  
 ubi Lerna puro gelida perlucet uado,  
 solesque uitat. hinc aues querulae fremunt  
 ramique uentis lene percussi tremunt  
 \* 509a  
 ueteresque fagi. iuuat <et> aut amnis uagi  
 pressisse ripas, caespite aut nudo leues  
 duxisse somnos, siue fons largus citas  
 defundit undas, siue per flores nouos  
 fugiente dulcis murmurat riuo sonus.  
 excussa siluis poma compescunt famem 515  
 et fraga paruis uulsa dumetis cibos  
 faciles ministrant. regios luxus procul  
 est impetus fugisse: sollicito bibunt  
 auro superbi; quam iuuat nuda manu  
 captasse fontem! certior somnus premit 520  
 secreta duro membra laxantem toro.  
 non in recessu furta et obscuro improbus  
 quaerit cubili seque multiplici timens  
 domo recondit: aethera ac lucem petit  
 et teste caelo uiuit. Hoc equidem reor 525

uixisse ritu prima quos mixtos deis  
 profudit aetas. nullus his auri fuit  
 caecus cupido, nullus in campo sacer  
 diuisit agros arbiter populis lapis;  
 nondum secabant credulae pontum rates: 530  
 sua quisque norat maria; non uasto aggere  
 crebraque turre cinxerant urbes latus;  
 non arma saeua miles aptabat manu  
 nec torta clausas fregerat saxo graui  
 ballista portas, iussa nec dominum pati 535  
 iuncto ferebat terra seruitium boue:  
 sed arua per se feta poscentes nihil  
 pauere gentes, silua natiuas opes  
 et opaca dederant antra natiuas domos.  
 Rupere foedus impius lucri furor 540  
 et ira praeceps quaeque succensas agit  
 libido mentes; uenit imperii sitis  
 cruenta, factus praeda maiori minor:  
 pro iure uires esse. tum primum manu  
 bellare nuda saxaque et ramos rudes 545  
 uertere in arma: non erat gracili leuis  
 armata ferro cornus aut longo latus  
 mucrone cingens ensis aut crista procul  
 galeae micantes: tela faciebat dolor.  
 inuenit artes bellicus Mauors nouas 550  
 et mille formas mortis. hinc terras cruor  
 infecit omnis fusus et rubuit mare.  
 tum scelera dempto fine per cunctas domos  
 iere, nullum caruit exemplo nefas:  
 a fratre frater, dextera gnati parens 555  
 cecidit, maritus coniugis ferro iacet  
 perimuntque fetus impiae matres suos;  
 taceo nouercas: mitius nil est feris.  
 Sed dux malorum femina: haec scelerum artifex  
 obsedit animos, huius incestae stupris 560  
 fumant tot urbes, bella tot gentes gerunt  
 et uersa ab imo regna tot populos premunt.  
 sileantur aliae: sola coniunx Aegei,  
 Medea, reddet feminas dirum genus.  
 Nvt. Cur omnium fit culpa paucarum scelus? 565  
 Hi. Detestor omnis, horreo fugio execror.  
 sit ratio, sit natura, sit dirus furor:  
 odisse placuit. ignibus iunges aquas  
 et amica ratibus ante promittet uada  
 incerta Syrtis, ante ab extremo sinu 570  
 Hesperia Tethys lucidum attollet diem  
 et ora dammis blanda praebebunt lupi,  
 quam uictus animum feminae mitem geram.  
 Nvt. Saepe obstinatis induit frenos Amor

et odia mutat. regna materna aspice: 575  
 illae feroces sentiunt Veneris iugum;  
 testaris istud unicus gentis puer.  
 Hi. Solamen unum matris amissae fero,  
 odisse quod iam feminas omnis licet.  
 Nvt. Vt dura cautes undique intractabilis 580  
 resistit undis et lacessentes aquas  
 longe remittit, uerba sic spernit mea.  
 Sed Phaedra praeceps graditur, impatiens morae.  
 quo se dabit fortuna? quo uerget furor?  
 terrae repente corpus exanimus accidit 585  
 et ora morti similis obduxit color.  
 attolle uultus, dimoue uocis moras:  
 tuus en, alumna, temet Hippolytus tenet.  
 Phaedra Quis me dolori reddit atque aestus graues  
 reponit animo? quam bene excideram mihi! 590  
 Hi. Cur dulce munus redditae lucis fugis?  
 Ph. Aude, anime, tempta, perage mandatum tuum.  
 intrepida constant uerba: qui timide rogat  
 docet negare. magna pars sceleris mei  
 olim peracta est; serus est nobis pudor: 595  
 admouimus nefanda. si coepta exequor,  
 forsitan iugali crimen abscondam face:  
 honesta quaedam scelera successus facit.  
 en, incipe, anime!--Commodus paulum, precor,  
 secretus aures. si quis est abeat comes. 600  
 Hi. En locus ab omni liber arbitrio uacat.  
 Ph. Sed ora coeptis transitum uerbis negant;  
 uis magna uocem mittit et maior tenet.  
 uos testor omnis, caelites, hoc quod uolo  
 me nolle. 605  
 Hi. Animusne cupiens aliquid effari nequit?  
 Ph. Curae leues locuntur, ingentes stupent.  
 Hi. Committe curas auribus, mater, meis.  
 Ph. Matris superbum est nomen et nimium potens:  
 nostros humilius nomen affectus decet; 610  
 me uel sororem, Hippolyte, uel famulam uoca,  
 famulamque potius: omne seruitium feram.  
 non me per altas ire si iubeas niues  
 pigeat gelatis ingredi Pindi iugis;  
 non, si per ignes ire et infesta agmina, 615  
 cuncter paratis ensibus pectus dare.  
 mandata recipe sceptrum, me famulam accipe:  
 [te imperia regere, me decet iussa exequi]  
 muliebri non est regna tutari urbium.  
 tu qui iuuentae flore prima uo uiges, 620  
 ciues paterno fortis imperio rege;  
 sinu receptam supplicem ac seruam tege:  
 miserere uiduae. Hi. Summus hoc omen deus

auertat. aderit sospes actutum parens.  
 Ph. Regni tenacis dominus et tacitae Stygis 625  
 nullam relictos fecit ad superos uiam:  
 thalami remittet ille raptorem sui?  
 nisi forte amor placidus et Pluton sedet.  
 Hi. Illum quidem aequi caelites reducem dabunt.  
 sed dum tenebit uota in incerto deus, 630  
 pietate caros debita fratres colam,  
 et te merebor esse ne uiduam putes  
 ac tibi parentis ipse supplebo locum.  
 Ph. O spes amantum credula, o fallax Amor!  
 satisne dixi?--precibus admotis agam. 635  
 Miserere, pauidae mentis exaudi preces--  
 libet loqui pigetque. Hi. Quodnam istud malum est?  
 Ph. Quod in nouercam cadere uix credas malum.  
 Hi. Ambigua uoce uerba perplexa iacis:  
 effare aperte. Ph. Pectus insanum uapor 640  
 amorque torret. intimis saeuit ferus  
 [penitus medullas atque per uenas meat]  
 uisceribus ignis mersus et uenas latens  
 ut agilis altas flamma percurrit trabes.  
 Hi. Amore nempe Thesei casto furis? 645  
 Ph. Hippolyte, sic est: Thesei uultus amo  
 illos priores, quos tulit quondam puer,  
 cum prima puras barba signaret genas  
 monstrique caecam Gnosii uidit domum  
 et longa curua fila collegit uia. 650  
 quis tum ille fulsit! presserant uittae comam  
 et ora flauus tenera tinguebat pudor;  
 inerant lacertis mollibus fortes tori,  
 tuaeque Phoebes uultus aut Phoebi mei,  
 tuusue potius--talis, en talis fuit 655  
 cum placuit hosti, sic tulit celsum caput.  
 in te magis refulget incomptus decor:  
 est genitor in te totus et toruae tamen  
 pars aliqua matris miscet ex aequo decus:  
 in ore Graio Scythicus apparet rigor. 660  
 si cum parente Creticum intrasses fretum,  
 tibi fila potius nostra neuisset soror.  
 Te te, soror, quacumque siderei poli  
 in parte fulges, inuoco ad causam parem:  
 domus sorores una corripuit duas, 665  
 te genitor, at me gnatus.--en supplex iacet  
 adlapsa genibus regiae proles domus.  
 respersa nulla labe et intacta, innocens  
 tibi mutor uni. certa descendi ad preces:  
 finem hic dolori faciet aut uitae dies. 670  
 miserere amantis.--Hi. Magne regnator deum,  
 tam lentus audis scelera? tam lentus uides?

et quando saeua fulmen emittes manu,  
 si nunc serenum est? omnis impulsus ruat  
 aether et atris nubibus condat diem, 675  
 ac uersa retro sidera obliquos agant  
 retorta cursus. tuque, sidereum caput,  
 radiate Titan, tu nefas stirpis tuae  
 speculari? lucem merge et in tenebras fuge.  
 cur dextra, diuum rector atque hominum, uacat 680  
 tua, nec trisulca mundus ardescit face?  
 in me tona, me fige, me uelox cremet  
 transactus ignis: sum nocens, merui mori:  
 placui nouercae. dignus en stupris ego?  
 scelerique tanto uisus ego solus tibi 685  
 materia facilis? hoc meus meruit rigor?  
 o scelere uincens omne femineum genus,  
 o maius ausa matre monstifera malum  
 genetrice peior! illa se tantum stupro  
 contaminauit, et tamen tacitum diu 690  
 crimen biformi partus exhibuit nota,  
 scelusque matris arguit uultu truci  
 ambiguus infans--ille te uenter tulit.  
 o ter quaterque prospero fato dati  
 quos hausit et peremit et leto dedit 695  
 odium dolusque--genitor, inuideo tibi:  
 Colchide nouerca maius hoc, maius malum est.  
 Ph. Et ipsa nostrae fata cognosco domus:  
 fugienda petimus; sed mei non sum potens.  
 te uel per ignes, per mare insanum sequar 700  
 rupesque et amnes, unda quos torrens rapit;  
 quacumque gressus tuleris hac amens agar--  
 iterum, superbe, genibus aduoluor tuis.  
 Hi. Procul impudicos corpore a casto amoue  
 tactus--quid hoc est? etiam in amplexus ruit? 705  
 stringatur ensis, merita supplicia exigit.  
 en impudicum crine contorto caput  
 laeua reflexi: iustior numquam focus  
 datus tuis est sanguis, arquitenens dea.  
 Ph. Hippolyte, nunc me compotem uoti facis; 710  
 sanas furentem. maius hoc uoto meo est,  
 saluo ut pudore manibus immoriar tuis.  
 Hi. Abscede, uiue, ne quid exores, et hic  
 contactus ensis deserat castum latus.  
 quis eluet me Tanais aut quae barbaris 715  
 Maeotis undis Pontico incumbens mari?  
 non ipse toto magnus Oceano pater  
 tantum expiarit sceleris. o siluae, o ferae!  
 Nvt. Deprensa culpa est. anime, quid segnis stupes?  
 regeramus ipsi crimen atque ultro impiam 720  
 Venerem arguamus: scelere uelandum est scelus;

tutissimum est inferre, cum timeas, gradum.  
ausae priores simus an passae nefas,  
secreta cum sit culpa, quis testis sciet?

725

Adeste, Athenae! fida famulorum manus,  
fer opem! nefandi raptor Hippolytus stupri  
instat premitque, mortis intentat metum,  
ferro pudicam terret--en praeceps abit  
ensemque trepida liquit attonitus fuga.

730

pignus tenemus sceleris. hanc maestam prius  
recreate. crinis tractus et lacerae comae  
ut sunt remaneant, facinoris tanti notae.  
perferte in urbem!--Recipe iam sensus, era.  
quid te ipsa lacerans omnium aspectus fugis?  
mens impudicam facere, non casus, solet.

735

Chorvs Fugit insanae similis procellae,  
ocior nubes glomerante Coro,  
ocior cursum rapiente flamma,  
stella cum uentis agitata longos  
porrigit ignes. 740

Conferat tecum decus omne priscum  
fama miratrix senioris aevi:  
pulcrior tanto tua forma lucet,  
clarior quanto micat orbe pleno  
cum suos ignes coeunte cornu 745  
iunxit et curru properante pernox  
exerit uultus rubicunda Phoebe  
nec tenent stellae faciem minores;  
talis est, primas referens tenebras,  
nuntius noctis, modo lotus undis 750  
Hesperus, pulsus iterum tenebris  
Lucifer idem.

Et tu, thyrsigera Liber ab India,  
intonsa iuuenis perpetuum coma,  
tigres pampinea cuspide temperans 755  
ac mitra cohibens cornigerum caput,  
non uinces rigidas Hippolyti comas.  
ne uultus nimium suspicias tuos:  
omnis per populos fabula distulit,  
Phaedrae quem Bromio praetulerit soror. 760

Anceps forma bonum mortalibus,  
exigui donum breue temporis,  
ut uelox celeri pede laberis!  
non sic prata nouo uere decencia  
aestatis calidae despoliat uapor 765  
(saeuit solstitio cum medius dies  
et noctes breuibus praecipitat rotis),  
languescunt folio lilia pallido  
et gratae capiti deficiunt rosae,  
ut fulgor teneris qui radiat genis 770

momento rapitur nullaque non dies  
 formosi spoliū corporis abstulit.  
 res est forma fugax: quis sapiens bono  
 confidat fragili? dum licet, utere.  
 tempus te tacitum subruit, horaque 775  
 semper praeterita deterior subit.  
 Quid deserta petis? tutior auis  
 non est forma locis: te nemore abdito,  
 cum Titan medium constituit diem,  
 cingent, turba licens, Naidēs improbae, 780  
 formosos solitae claudere fontibus,  
 et somnis facient insidias tuis  
 lasciuae nemorum deae  
 montiuagiae Panes.  
 Aut te stellifero despiciens polo 785  
 sidus post ueteres Arcadas editum  
 currus non poterit flectere candidos.  
 en nuper rubuit, nullaque lucidis  
 nubes sordidior uultibus obstitit;  
 at nos solliciti numine turbido, 790  
 tractam Thessalicis carminibus rati,  
 tinnitus dedimus: tu fueras labor  
 et tu causa morae, te dea noctium  
 dum spectat celeres sustinuit uias.  
 Vexent hanc faciem frigora parcius, 795  
 haec solem facies rarius appetat:  
 lucebit Pario marmore clarius.  
 quam grata est facies torua uiriliter  
 et pondus ueteris triste supercili!  
 Phoebō colla licet splendida compares: 800  
 illum caesaries nescia colligi  
 perfundens umeros ornat et integit;  
 te frons hirta decet, te breuior coma  
 nulla lege iacens; tu licet asperos  
 pugnacesque deos uiribus audeas 805  
 et uasti spatio uincere corporis:  
 aequas Herculeos nam iuuenis toros,  
 Martis belligeri pectore latior.  
 si dorso libeat cornipedis uehi,  
 frenis Castorea mobilior manu 810  
 Spartanum poteris flectere Cyllaron.  
 Ammentum digitis tende prioribus  
 et totis iaculum derige uiribus:  
 tam longe, dociles spicula figere,  
 non mittent gracilem Cretes harundinem. 815  
 aut si tela modo spargere Parthico  
 in caelum placeat, nulla sine alite  
 descendent, tepido uiscere condita  
 praedam de mediis nubibus afferent.

Raris forma uiris (saecula perspice) 820  
impunita fuit. te melior deus  
tutum praetereat formaque nobilis  
deformis senii monstret imaginem.

Quid sinat inausum feminae praeceps furor?  
nefanda iuueni crimina insonti apparat. 825  
en scelera! quaerit crine lacerato fidem,  
decus omne turbat capitis, umectat genas:  
instruitur omni fraude feminea dolus.

Sed iste quisnam est regium in uultu decus  
gerens et alto uertice attollens caput? 830  
ut ora iuueni paria Pittheo gerit,  
ni languido pallore canderent genae  
staretque recta squalor incultus coma!  
en ipse Theseus redditus terris adest.

Thesevs Tandem profugi noctis aeternae plagam 835  
uastoque manes carcere umbrantem polum,  
et uix cupitum sufferunt oculi diem.  
iam quarta Eleusin dona Triptolemi secat  
paremque totiens libra composuit diem,  
ambiguus ut me sortis ignotae labor 840  
detinuit inter mortis et uitae mala.  
pars una uitae mansit extincto mihi,  
sensus malorum; finis Alcides fuit,  
qui cum reuulsum Tartaro abstraheret canem,  
me quoque supernas pariter ad sedes tulit. 845  
sed fessa uirtus robore antiquo caret  
trepidantque gressus. heu, labor quantus fuit  
Phlegethonte ab imo petere longinquum aethera  
pariterque mortem fugere et Alciden sequi.

Quis fremitus aures flebilis pepulit meas? 850  
expromat aliquis. luctus et lacrimae et dolor,  
in limine ipso maesta lamentatio?  
hospitia digna prorsus inferno hospite.

Nvtrix Tenet obstinatum Phaedra consilium necis  
fletusque nostros spernit ac morti imminet. 855  
Th. Quae causa leti? reduce cur moritur uiro?  
Nvt. Haec ipsa letum causa maturum attulit.  
Th. Perplexa magnum uerba nescioquid tegunt.  
effare aperte, quis grauet mentem dolor.

Nvt. Haut pandit ulli; maesta secretum occultit 860  
statuitque secum ferre quo moritur malum.  
iam perge, quaeso, perge: properato est opus.  
Th. Reserate clausos regii postes laris.

O socia thalami, sicine aduentum uiri  
et expetiti coniugis uultum excipis? 865  
quin ense uiduas dexteram atque animum mihi  
restituis et te quidquid e uita fugat  
expromis? Ph. Eheu, per tui sceptrum imperi,

magnanime Theseu, perque natorum indolem  
 tuosque reditus perque iam cineres meos, 870  
 permitte mortem. Th. Causa quae cogit mori?  
 Ph. Si causa leti dicitur, fructus perit.  
 Th. Nemo istud alius, me quidem excepto, audiet.  
 Ph. Aures pudica coniugis solas timet.  
 Th. Effare: fido pectore arcana occulam. 875  
 Ph. Alium silere quod uoles, primus sile.  
 Th. Leti facultas nulla continget tibi.  
 Ph. Mori uolenti desse mors numquam potest.  
 Th. Quod sit luendum morte delictum indica.  
 Ph. Quod uiuo. Th. Lacrimae nonne te nostrae mouent? 880  
 Ph. Mors optima est perire lacrimandum suis.  
 Th. Silere pergit.--uerbere ac uinclis anus  
 altrixque prodet quidquid haec fari abnuit.  
 Vincite ferro. uerberum uis extrahat  
 secreta mentis. Ph. Ipsa iam labor, mane. 885  
 Th. Quidnam ora maesta auertis et lacrimas genis  
 subito coortas ueste praetenta optegis?  
 Ph. Te te, creator caelitus, testem inuoco,  
 et te, coruscum lucis aetheriae iubar,  
 ex cuius ortu nostra dependet domus: 890  
 temptata precibus restiti; ferro ac minis  
 non cessit animus: uim tamen corpus tulit.  
 labem hanc pudoris eluet noster cruor.  
 Th. Quis, ede, nostri decoris euersor fuit?  
 Ph. Quem rere minime. Th. Quis sit audire expeto. 895  
 Ph. Hic dicet ensis, quem tumultu territus  
 liquit stuprator ciuium accursum timens.  
 Th. Quod facinus, heu me, cerno? quod monstrum intuo?  
 regale patriis asperum signis ebur  
 capulo refulget, gentis Actaeae decus. 900  
 sed ipse quonam euasit? Ph. Hi trepidum fuga  
 uidere famuli concitum celeri pede.  
 Th. Pro sancta Pietas, pro gubernator poli  
 et qui secundum fluctibus regnum moues,  
 unde ista uenit generis infandi lues? 905  
 hunc Graia tellus aluit an Taurus Scythes  
 Colchusque Phasis? reedit ad auctores genus  
 stirpemque primam degener sanguis refert.  
 est prorsus iste gentis armiferae furor,  
 odisse Veneris foedera et castum diu 910  
 uulgare populis corpus. o taetrum genus  
 nullaue uictum lege melioris soli!  
 ferae quoque ipsae Veneris euitant nefas,  
 generisque leges inscius seruat pudor.  
 Vbi uultus ille et ficta maiestas uiri 915  
 atque habitus horrens, prisca et antiqua appetens,  
 morumque senium triste et affectus graues?

o uita fallax, abditos sensus geris  
 animisque pulcram turpibus faciem induis:  
 pudor impudentem celat, audacem quies, 920  
 pietas nefandum; uera fallaces probant  
 simulantque molles dura. siluarum incola  
 ille efferatus castus intactus rudis,  
 mihi te reseruas? a meo primum toro  
 et scelere tanto placuit ordiri uirum? 925  
 iam iam superno numini grates ago,  
 quod icta nostra cecidit Antiope manu,  
 quod non ad antra Stygia descendens tibi  
 matrem reliqui. Profugus ignotas procul  
 percurre gentes: te licet terra ultimo 930  
 summota mundo dirimat Oceani plagis  
 orbemque nostris pedibus obuersum colas,  
 licet in recessu penitus extremo abditus  
 horrifera celsi regna transieris poli  
 hiemesque supra positus et canas niues 935  
 gelidi frementes liqueris Boreae minas  
 post te furentes, sceleribus poenas dabis.  
 profugum per omnis pertinax latebras premam:  
 longinqua clausa abstrusa diuersa inuia  
 emetiemur, nullus obstabit locus: 940  
 scis unde redeam. tela quo mitti haud queunt,  
 huc uota mittam: genitor aequoreus dedit  
 ut uota prono terna concipiam deo,  
 et inuocata munus hoc sanxit Styge.  
 En perage donum triste, regnator freti! 945  
 non cernat ultra lucidum Hippolytus diem  
 adeatque manes iuuenis iratos patri.  
 fer abominandam nunc opem gnato, parens:  
 numquam supremum numinis munus tui  
 consumeremus, magna ni premerent mala; 950  
 inter profunda Tartara et Ditem horridum  
 et imminentes regis inferni minas,  
 uoto peperci: redde nunc pactam fidem.--  
 genitor, moraris? cur adhuc undae silent?  
 nunc atra uentis nubila impellentibus 955  
 subtexe noctem, sidera et caelum eripe,  
 effunde pontum, uulgus aequoreum cie  
 fluctusque ab ipso tumidus Oceano uoca.  
 Chorvs O magna parens, Natura, deum  
 tuque igniferi rector Olympi, 960  
 qui sparsa cito sidera mundo  
 cursusque uagos rapis astrorum  
 celerique polos cardine uersas,  
 cur tanta tibi cura perennes  
 agitare uices aetheris alti, 965  
 ut nunc canae frigora brumae





contra feroci gnatus insurgens minax  
 uultu nec ora mutat et magnum intonat: 1065  
 ' haud frangit animum uanus hic terror meum:  
 nam mihi paternus uincere est tauros labor.'  
 Inobsequentes protinus frenis equi  
 rapuere cursum iamque derrantes uia,  
 quacumque rabidos pauidus euexit furor, 1070  
 hac ire pergunt seque per scopulos agunt.  
 at ille, qualis turbido rector mari  
 ratem retentat, ne det obliquum latus,  
 et arte fluctum fallit, haud aliter citos  
 currus gubernat: ora nunc pressis trahit 1075  
 constricta frenis, terga nunc torto frequens  
 uerbere coercet. sequitur adsiduus comes,  
 nunc aequa carpens spatia, nunc contra obuius  
 oberrat, omni parte terrorem mouens.  
 non licuit ultra fugere: nam toto obuius 1080  
 incurrit ore corniger ponti horridus.  
 tum uero pauida sonipedes mente exciti  
 imperia soluunt seque luctantur iugo  
 eripere rectique in pedes iactant onus.  
 Praeceptis in ora fusus implicuit cadens 1085  
 laqueo tenaci corpus et quanto magis  
 pugnat, sequaces hoc magis nodos ligat.  
 sensere pecudes facinus--et curru leui,  
 dominante nullo, qua timor iussit ruunt.  
 talis per auras non suum agnoscens onus 1090  
 Solique falso creditum indignans diem  
 Phaethonta currus deuium excussit polo.  
 Late cruentat arua et inlisum caput  
 scopulis resultat; auferunt dum comas,  
 et ora durus pulcra populatur lapis 1095  
 peritque multo uulnere infelix decor.  
 moribunda celeres membra peruoluunt rotae;  
 tandemque raptum truncus ambusta sude  
 medium per inguen stipite ingesto tenet;  
 [paulumque domino currus affixo stetit] 1100  
 haesere biiuges uulnere--et pariter moram  
 dominumque rumpunt. inde semianimem secant  
 uirgulta, acutis asperi uepres rubis  
 omnisque ruscus corporis partem tulit.  
 Errant per agros funebris famuli manus, 1105  
 per illa qua distractus Hippolytus loca  
 longum cruenta tramitem signat nota,  
 maestaeque domini membra uestigant canes.  
 necdum dolentum sedulus potuit labor  
 explere corpus--hocine est formae decus? 1110  
 qui modo paterni clarus imperii comes  
 et certus heres siderum fulsit modo,

passim ad supremos ille colligitur rogos  
et funeri confertur. Th. O nimium potens  
quanto parentes sanguinis uinclo tenes 1115  
natura! quam te colimus inuiti quoque!  
occidere uolui noxium, amissum fleo.

Nvn. Haud flere honeste quisque quod uoluit potest.  
Th. Equidem malorum maximum hunc cumulum reor,  
si abominanda casus optanda efficit. 1120

Nvn. Et si odia seruas, cur madent fletu genae?

Th. Quod interemi, non quod amisi, fleo.

Chorvs Quanti casus, heu, magna rotant!  
minor in paruis Fortuna furit  
leuiusque ferit leuiores deus; 1125  
seruat placidos obscura quies  
praebetque senes casa securos.

Admota aetheriis culmina sedibus  
Euros excipiunt, excipiunt Notos,  
insani Boreae minas 1130  
imbriferumque Corum.  
Raros patitur fulminis ictus  
umida uallis:

tremuit telo Iouis altisoni  
Caucasus ingens Phrygiumque nemus 1135  
matris Cybeles: metuens caelo  
Iuppiter alto uicina petit;  
non capit umquam magnos motus  
humilis tecti plebeia domus.

[circa regna tonat] 1140

Volat ambiguus mobilis alis  
hora, nec ulli praestat uelox  
Fortuna fidem:

hic qui clari sidera mundi  
nitidumque diem \* \* \* morte relicta 1145  
luget maestos tristis reditus  
ipsoque magis flebile Auerno  
sedis patriae uidet hospitium.

Pallas Actaeae ueneranda genti,  
quod tuus caelum superosque Theseus 1150  
spectat et fugit Stygias paludes,  
casta nil debes patruo rapaci:  
constat inferno numerus tyranno.

Quae uox ab altis flebilis tectis sonat  
strictoque uecors Phaedra quid ferro parat? 1155

Thesevs Quis te dolore percitam instigat furor?  
quid ensis iste quidue uociferatio  
plactusque supra corpus inuisum uolunt?

Phaedra Me me, profundi saeue dominator freti,  
inuade et in me monstra caerulei maris 1160  
emitte, quidquid intimo Tethys sinu

extrema gestat, quidquid Oceanus uagis  
 complexus undis ultimo fluctu tegit.  
 O dure Theseu semper, o numquam tuis  
 tuto reuerse: gnatus et genitor nece 1165  
 reditus tuos luere; peruertis domum  
 amore semper coniugum aut odio nocens.  
 Hippolyte, tales intuo uultus tuos  
 talesque feci? membra quis saeuus Sinis  
 aut quis Procrustes sparsit aut quis Cresius, 1170  
 Daedalea uasto claustra mugitu replens,  
 taurus biformis ore cornigero ferox  
 diuulsit? heu me, quo tuus fugit decor  
 oculique nostrum sidus? exanimis iaces?  
 ades parumper uerbaque exaudi mea. 1175  
 nil turpe loquimur: hac manu poenas tibi  
 soluam et nefando pectori ferrum inseram,  
 animaue Phaedram pariter ac scelere exuam.  
 [et te per undas perque Tartareos lacus,  
 per Styga, per amnes igneos amens sequar] 1180  
 placemus umbras: capitis exuuias cape  
 laceraeque frontis accipe abscisam comam.  
 non licuit animos iungere, at certe licet  
 iunxisse fata. morere, si casta es, uiro;  
 si incesta, amori. coniugis thalamos petam 1185  
 tanto impiatos facinore? hoc derat nefas,  
 ut uindicato sancta fruereris toro.  
 o mors amoris una sedamen mali,  
 o mors pudoris maximum laesi decus,  
 confugimus ad te: pande placatos sinus. 1190  
 Audite, Athenae, tuque, funesta pater  
 peior nouerca: falsa memorauit et nefas,  
 quod ipsa demens pectore insano hauseram,  
 mentita finxi. uana punisti pater,  
 iuuenisque castus crimine incesto iacet, 1195  
 pudicus, insons--recipe iam mores tuos.  
 mucrone pectus impium iusto patet  
 cruorque sancto soluit inferias uiro.  
 Th. Quid facere raptu debeas gnato parens,  
 disce a nouerca: condere Acherontis plagis. 1200  
 Pallidi fauces Auerni uosque, Taenarii specus,  
 unda miseris grata Lethes uosque, torpentes lacus,  
 impium rapite atque mersum premite perpetuis malis.  
 nunc adeste, saeua ponti monstra, nunc uasti maris,  
 ultimo quodcumque Proteus aequorum abscondit sinu, 1205  
 meque ouantem scelere tanto rapite in altos gurgites.  
 Tuque semper, genitor, irae facilis assensor meae:  
 morte facili dignus haud sum qui noua natum nece  
 segregem sparsi per agros quique, dum falsum nefas  
 exsequor uindex seuerus, incidi in uerum scelus. 1210

sidera et manes et undas scelere compleui meo:  
amplius sors nulla restat; regna me norunt tria.

In hoc redimus? patuit ad caelum uia,  
bina ut uiderem funera et geminam necem,  
caelebs et orbus funebres una face 1215  
ut concremarem prolis ac thalami rogos?

donator atrae lucis, Alcide, tuum  
Diti remitte munus; ereptos mihi  
restituere manes.--impius frustra inuoco  
mortem relictam: crudus et leti artifex, 1220

exitia machinatus insolita effera,  
nunc tibimet ipse iusta supplicia irroga.  
pinus coacto uertice attingens humum  
caelo remissum findat in geminas trabes,  
mittarue praeceps saxa per Scironia? 1225

grauiora uidi, quae pati clausos iubet  
Phlegethon nocentes igneo cingens uado.  
quae poena memet maneat et sedes, scio:  
umbrae nocentes, cedite et ceruicibus  
his, his repositum degrauet fessas manus 1230

saxum, seni perennis Aeolio labor;  
me ludat amnis ora uicina alluens;  
uultur relicto transuolet Tityo ferus  
meumque poenae semper accrescat iecur;  
et tu mei requiesce Pirithoi pater: 1235

haec incitatis membra turbinibus ferat  
nusquam resistens orbe reuoluto rota.  
Dehisce tellus, recipe me dirum chaos,  
recipe, haec ad umbras iustior nobis uia est:  
gnatum sequor--ne metue qui manes regis: 1240

casti uenimus; recipe me aeterna domo  
non exiturum.--non mouent diuos preces;  
at, si rogarem scelera, quam proni forent!  
Cho. Theseu, querelis tempus aeternum manet:  
nunc iusta nato solue et absconde ocius 1245  
dispersa foede membra laniatu effero.

Th. Huc, huc, reliquias uehite cari corporis  
pondusque et artus temere congestos date.  
Hippolytus hic est? crimen agnosco meum:  
ego te peremi; neu nocens tantum semel 1250

solusue fierem, facinus ausurus parens  
patrem aduocauit. munere in patrio fruor.  
o triste fractis orbitas annis malum!  
complectere artus, quodque de nato est super,  
miserande, maesto pectore incumbens, foue. 1255

Disiecta, genitor, membra laceri corporis  
in ordinem dispone et errantes loco  
restituere partes: fortis hic dextrae locus,  
hic laeua frenis docta moderandis manus

ponenda: laeui lateris agnosco notas. 1260  
 quam magna lacrimis pars adhuc nostris abest!  
 durate trepidae lugubri officio manus,  
 fletusque largos sistite, arentes genae,  
 dum membra nato genitor adnumerat suo  
 corpusque fingit. hoc quid est forma carens 1265  
 et turpe, multo uulnere abruptum undique?  
 quae pars tui sit dubito; sed pars est tui:  
 hic, hic repone, non suo, at uacuo loco.  
 haecne illa facies igne sidereo nitens,  
 ~inimica flectens lumina? huc cecidit decor? 1270  
 o dira fata, numinum o saeuus fauor!  
 sic ad parentem natus ex uoto redit?  
 en haec suprema dona genitoris cape,  
 saepe efferendus; interim haec ignes ferant.  
 Patefacite acerbam caede funesta domum; 1275  
 Mopsopia claris tota lamentis sonet.  
 uos apparate regii flammam rogi;  
 at uos per agros corporis partes uagas  
 inquirete.--istam terra defossam premat,  
 grauisque tellus impio capiti incubet.